

Na osnovu člana 15. Zakona o principima lokalne samouprave u Federaciji BiH ("Službene novine FBiH", br. 46/08 i 51/09), člana 57. Statuta Općine Ilijaš – prečišćeni tekst ("Službene novine Kantona Sarajevo", broj: 20/09 i 46/18), člana 16. i 17. Zakona o poticaju razvoja male privrede ("Službene novine Kantona Sarajevo", br. 29/15) i člana 5. Odluke o podsticaju privrednim subjektima na području općine Ilijaš kroz regresiranje ukupne kamatne stope ("Službene novine Kantona Sarajevo", br. 17/20), Općinski načelnik putem Službe za privredu i finansije Općine Ilijaš, **d o n o s i:**

P R A V I L N I K

o uslovima, kriterijima i načinu provedbe Odluke o podsticaju privrednim subjektima na području općine Ilijaš kroz regresiranje ukupne kamatne stope

OSNOVNE ODREDBE

Član 1.

Ovim Pravilnikom utvrđuju se uslovi, kriteriji i način provedbe Odluke o podsticaju privrednim subjektima na području općine Ilijaš kroz regresiranje ukupne kamatne stope (u daljem tekstu "Odluka o podsticaju").

Cilj podsticaja je podrška privrednim subjektima radi održavanja postojećeg nivoa privrednih aktivnosti, zaposlenosti i novih investicija.

Član 2.

Korisnici podsticaja mogu biti svi privredni subjekti (privredna društva i samostalni preduzetnici), koji imaju registrovano sjedište ili poslovnu jedinicu/podružnicu na području općine Ilijaš.

Utvrđivanje prava na poticaj, odnosno ispunjenosti propisanih uslova će se provoditi putem odabrane banke.

POSTUPAK ODABIRA BANKE

Član 3.

Odabir banke putem koje će se provoditi podsticaj, odnosno putem koje će se implementirati regresiranje ukupne kamatne stope prema korisnicima podsticaja će provoditi putem Javnog poziva poslovnim bankama za plasman kreditne linije (u daljem tekstu: "Javni poziv prema bankama") uz subvencioniranje ukupne kamatne stope za privredne subjekte iz člana 2, stav (1) ove Odluke koji posluju na području općine Ilijaš.

Komisija imenovana od strane Općinskog načelnika priprema tekst Javnog poziva prema bankama, otvara prispjele ponude, vrši postupak bodovanja prispjelih ponuda, formira rang listu i na bazi iste predlaže potpisivanje ugovora sa odabranom bankom.

Član 4.

Banka putem koje se provoditi podsticaj mora ispunjavati propisane uslove, koje dokazuje u postupku apliciranja na Javni poziv prema bankama, prilažući sljedeću dokumentaciju:

- a) Rješenje o upisu u sudski registar,
- b) Licenca (dozvola za rad) nadležne Agencije za bankarstvo,
- c) Certifikat Agencije za osiguranje depozita,
- d) Uvjerenje o poreznom identifikacionom broju i Uvjerenje o PDV broju,
- e) Uvjerenje nadležne Poreske uprave o izmirenim porezima i doprinosima kojim se potvrđuje da su izmireni direktni porezi, te doprinosi za PIO/MIO i zdravstveno osiguranje (ne starije od 3 /tri/ mjeseca od dana podnošenja prijave,
- f) Izjava da je banka pozitivno poslovala u prethodne 3 /tri/ godine,
- g) Uvjerenje nadležnog suda kod kojeg je izvršena registracija da nije pod stečajem, niti je predmetom stečajnog postupka, da nije predmetom postupka likvidacije, odnosno da nije u postupku obustavljanja poslovne djelatnosti u skladu sa važećim propisima,
- h) Izjava da visina kapitala na dan 31.12.2019. godine nije manja od 100 miliona KM, te opciono
- i) Dokaz da banka posjeduje organizacionu jedinicu na području općine Ilijaš.

Svi dokumenti koji se prilaže uz prijavu moraju biti u originalu ili ovjerene kopije nadležnog tijela uprave ili notara.

Član 5.

Ponude banaka će se vrednovati prema sljedećim kriterijima:

a) visina kamatne stope, učešće kriterija 70 %, s tim da ponuđena kamatna stopa mora biti fiksna kamatna stopa u cjelokupnom periodu implementacije kreditne linije, odnosno otplate odobrenog kredita.

Maksimalni broj bodova (70 bodova) će se dodijeliti ponuđaču koji je ponudio najnižu kamatnu stopu. Ostali ponuđači će ostvariti niži broj bodova prema sljedećoj formuli:

$$K=Kt/KI \times 70$$

Pri čemu je:

K-broj bodova koje je ponuđač ostvario

KI-najniža ponuđena kamatna stopa

Kt-ponuđena visina kamatne stope

70 – maksimalni broj bodova koji je dodijeljen ponuđaču koji je ponudio najnižu kamatnu stopu.

b) troškovi obrade kredita, učešće kriterija 20%, s tim da troškovi obrade kredita ne smiju biti preko 1% iznosa finansiranja (vrijednosti odobrenog kredita)

$$T=Tt/TI \times 20$$

Pri čemu je:

T-broj bodova koje je ponuđač ostvario

TI-najniža visina troškova obrade kredita, $TI < 0,01$, odnosno 1%

Tt-ponuđena visina troškova obrade kredita, $Tt < 0,01$, odnosno 1%

20 – maksimalni broj bodova koji je dodijeljen ponuđaču koji je ponudio najnižu visinu troškova obrade kredita.

c) visina sredstava za kreditnu liniju, učešće kriterija 5 %

$$L=LI/Lt \times 5$$

Pri čemu je:

L-broj bodova koje je ponuđač ostvario

Lt-najviša visina sredstava za kreditnu liniju

LI-ponuđena visina sredstava za kreditnu liniju

5 – maksimalni broj bodova koji je dodijeljen ponuđaču koji je ponudio najvišu visinu sredstava za kreditnu liniju

d) postojanje filijale/poslovnice na području Općine, učešće kriterija 5 bodova

Ponuđač koji na području općine Ilijaš posjeduje organizacionu jedinicu (filijalu/poslovnicu/ispostavu), ostvaruje 5 bodova. Ponuđači koji ne posjeduju organizacionu jedinicu na području općine Ilijaš po osnovu ovog kriterija ne ostvaruju bodove.

Vrednovanje pojedinačne ponude – VP, se vrši prema sljedećoj formuli

$$VP=K+T+L+(5, \text{opciono})$$

Član 6.

Nakon provedenog postupka vrednovanja sačinjava se rang lista prispjelih ponuda.

Na osnovu utvrđene rang liste Općinski načelnik na prijedlog Komisije donosi Odluku o dodjeli ugovora banci koja je ostvarila najveći broj bodova.

Sve banke učesnice po Javnom pozivu, će biti obaviještene o rezultatima provedenog postupka u roku od 7 (sedam) dana od dana zatvaranja Javnog poziva prema bankama.

Nezadovoljna strana može izjaviti žalbu Drugostepenoj Komisiji Općinskog vijeća Ilijaš u roku od 7 (sedam) dana od dana prijema obavijesti / Odluke o dodjeli ugovora.

Član 7.

Obaveze odabrane banke su:

-Procedure odabira korisnika podsticaja

Banka je obavezna nakon zaključivanja Ugovora pripremiti i objaviti Javni poziv za dodjelu podsticajnih kreditnih sredstava (u daljem tekstu : "Javni poziv"). Banka je prije objave Javnog poziva dužna pribaviti saglasnost Općine Ilijaš na pripremljeni tekst Javnog poziva. Javni poziv banke objavljuju kao kontinuirani poziv do utroška odobrenih sredstava Budžetom Općine Ilijaš za 2020. godinu.

Banka razmatra zaprimljene prijave u skladu sa Odlukom o podsticaju, ovim Pravilnikom, potpisanim Ugovorom i Javnim pozivom, te provodi i druge potrebne aktivnosti u skladu sa internim aktima i procedurama banke.

Podsticaj se ne može koristiti za prebijanje ranije preuzetih kreditnih obaveza privrednih subjekata u bankama i drugim finansijskim institucijama.

-Pribavljanje dokaza o ispunjenosti uslova za dodjelu podsticaja u skladu sa propisima sistema državne pomoći u Bosni i Hercegovini (pomoć male vrijednosti, de minimis" izjava)

Banka je u obavezi u postupku odabira korisnika kredita utvrditi ispunjenost uslova od strane aplikanta u smislu važećih propisa sistema državne pomoći u Bosni i Hercegovini, te dokaze o istom dostaviti Općini.

-Pribavljanje saglasnosti od strane Općinskog načelnika za plasman kredita

Banka uz pismenu saglasnost Općinskog načelnika zaključuje ugovore sa korisnicima kreditnih sredstava i jedan primjerak zaključenog Ugovora dostavlja Općini.

-Plasman kredita i monitoring realizacije

Odobreni kredit po jednom korisniku se ograničava na maksimalni iznos od 300.000,00 KM za privredna društva i 50.000,00 KM za samostalne preduzetnike/djelatnosti fizičkih lica, sa minimalnim rokom otplate od 12 mjeseci i maksimalnim rokom otplate od 60 mjeseca.

Banci pripadaju troškovi obrade po odobrenim kreditima, kao i ostali troškovi koje snosi privredni subjekt, korisnik kredita.

Banka u potpunosti snosi rizik naplate odobrenih kredita.

-Periodično izvještavanje o zajedničkoj kreditnoj liniji i korisnicima podsticaja.

Banka se obavezuje godišnje izvještavati Općinu Ilijaš o namjenskom trošenju odobrenih kreditnih sredstava.

Privredni subjekti/Korisnici kredita su dužni dostavljati izvještaje o namjenskom utrošku sredstava prema banci.

NAČIN PODNOŠENJA PRIJAVA BANAKA

Član 8.

Banke aplikanti dostavljaju prijave u zatvorenoj koverti. Svi prilozi uz prijavu moraju biti u originalu ili ovjerene kopije. Prijave se predaju na protokol Općine Ilijaš ili putem pošte.

Na prednjoj strani koverta mora biti navedeno, sljedeće:

Općina Ilijaš

126.ilijaške brigade br. 6., Ilijaš

71 380 Ilijaš

/"Prijava na Javni poziv prema bankama – NE OTVARAJ"/

Na poledini koverta mora biti navedeno, sljedeće:

Naziv podnosioca

Adresa i poštanski broj

Kontakt telefon

(upisane podatke na poledini koverta, obavezno ovjeriti pečatom podnosioca prijave)

Ponude se dostavljaju u vremenu (do datuma) koji će biti naznačen u Javnom pozivu. Sve ponude zaprimljene nakon tog vremena su neblagovremene, i kao takve će biti odbačene.

Ponuda se čvrsto uvezuje tako da se onemogućiti naknadno vađenje ili umetanje listova.

Stranice ponude moraju biti numerisane, odnosno kontinuirano označene brojevima tako da je jasno vidljiv redni broj stranice. Ponude koje ne budu na propisan način uvezane i/ili numerisane će biti odbačene.

Član 9.

OSTALE ODREDBE

Općina Ilijaš ne snosi troškove učesnika Javnog poziva prema bankama, kojeg provodi niti Javnog poziva prema privrednim subjektima, kojeg provodi odabrana banka. Općina Ilijaš zadržava pravo da poništi objavljeni Javni poziv prema bankama, ili da odbaci sve prispjele ponude u bilo koje vrijeme prije zaključenja Ugovora.

Prispjela dokumentacija se ne vraća podnosiocima ponuda. Općina Ilijaš ne snosi odgovornost prema učesnicima Javnog poziva prema bankama i Javnom poziv prema privrednim subjektima u pogledu aktivnosti koje su preduzeli u postupku apliciranja.

Općina Ilijaš će na pismeni zahtjev podnosioca ponude, koji bude odbijen zbog manje ocjene ponude, a udovoljava formalno-pravnim uslovima obrazložiti razloge zbog kojih ponuda nije odabrana.

ZAVRŠNE ODREDBE

Član 10.

Ovaj Pravilnik stupa na snagu danom donošenja.

Broj: 01/2-11-930/20
Ilijaš: 05.06.2020. godine

OPĆINSKI NAČELNIK

Akif Fazlić, dipl.oec

